

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



MZP CALLED ON GOVERNOR

MZP General Headquarters hruaitute chuan vawiin khan Larsap General (Rtd) Vijay Kumar Singh chu Raj Bhavan ah hmuin Mizo zirlaite tana hamthatna hrang hrang ngaihtuah pui turin an ngen.

Inkawmna ah hian Larsap chuan, MZP hruaitu tharte chu duhsakna hlanin ram leh hnam zirlaite tana an hnathawh leh hruaitu hluite inpekna chu fakawm a tih thu a sawi a, MZP in kum 90 a tling ta chu lawmawm a tih thu sawiin, October ni 27, 2025(Thawhtanni) chu 'Zirlaite Ni' leh MZP din champhaphak a nih angin zirlaite hnehah thuchah sawi a tum thu a sawi bawk.

He hunah hian, MZP hruaitute chuan, Governor hnenah hian term hmasa lama Union Home Minister hnen a an thlen hmun hrang hranga awm zirlai 100 tana Nation Integration Tour hlawhtling taka Border Security Force (BSF) ruahmanna a tour an lo buatsaih tawh chungchang sawipuiin, remchang hmasa berah College zirlaite tan tour buatsaih a nih ve leh theih nan a hmalak pui turin an sawm a, Coaching Institution tha a mizo zirlai tam zawk an kal theihna tur ngaihtuahpui turin an thlen a ni.

Larsap chuan, sawrkar nena hma la in mizo thalai tam zawkin a coaching institution tha an an kal theihna tur leh Mizoram chhung chauh nilo state dang leh India ram pawn thleng a hnathawk tura an in buatsaih a ngaih thu a sawi a, Placement Agency chah lut in, Mizoram-a job fair an neih theih nan ngaihtuahpui a tum thu a sawi a, Mizo thalaite ruihhlo laka kan fihlim theih nan, middle leh High school level ah nasa leh zual a awareness neih tuma hma an lak mekna chu tha tiin, a theih ang anga hmalak pui a a tum thu a sawi bawk.



CENTRAL JAIL

Central Jail ah tang 928 awmin heng zingah hian dam chhunga tang tur mi 54 an awm a, Hmeichhe jail ah erawh mi 152 awmin damchhung tang tur an awm lo a ni.

Sawrkar thuchhuah tarlan danin Central Jail ah hian tun dinhmunah mi 928 tang mekin heng zingah hian dam chhung tang tur mi 54 an awm a, Central Women’s Jail ah chuan mi 152 an awm a, heng zingah hian naupang 9 an awm ve bawk a ni.

Vawiin khan Mizoram Chief Secretary Pu Khilli Ram Meena chuan Central Jail a tlawh a. Central Jail chhunga ICTC (Integrated Counseling and Test Centre), Library, Computer Centre, Legal Aid Centre leh Convict Ward a fang a, Prisoners Welfare Committee (PWC) hruaitute kawmin, nitin an hun hman dan te, an hriselna chungchang leh an ei leh in chungchang te, harsatna an neih leh neih loh te a zawt a. ICTC viltu Dr. CT.Lalruatkima leh staff te kawmin, Jail tangte hriselna dinhmun leh an enkawl dan te a zawt bawk.

Central Jail hi kum 1986 a din niin a building a hluiin, a chhe tawh hle a. Tunah hian SASCI Part I hnuai atangin cheng vaibelchhe ₹13.925 senga sak that turin ruahmanna chak taka kalpui mek a ni a. Chief Secretary Pu Khilli Ram Meena chuan hnathawh theih hun chhunga a tam thei ang bera hna thawk hman tura inpuahchahna felfai tak neih a tul thu concern official te a hrilh bawk.



PRESBYTERY

Mizoram Synod hnuaia Inkhawmpui lian ber dawttu Presbytery Inkhawmpui chu nizan atanga tan a ni a, Pathianni zanah a tiak ang.

Mizoram Synod hnuaiah hian Presbytery hi 47 awmin Presbytery inkhawmpui rorel hi nimin khan zawhfel a ni a. Vawiin Zirtawpni leh naktuk Inrinni hian Rorel Inkhawm neih a ni ang a, zan lamah vantlang Pathian biak Inkhawm neih a ni dawn a, Synod Moderator Rev. R.C. Lalnghakliana chuan Tuivai Presbytery a hmanpui a ni.

October 12, 2025 (Pathianni) chawhmaah Upa Nemngheh Inkhawm a ni ang a, chawhnuah Lalpa Zanriah Sakramen leh Upa thite sunna inkhawm a awm ang a, Zan inkhawmah Presbytery Moderator kalchhuakte’n Valedictory Sermon an sawi dawn a, Mizoram Presbyterian kohhran hnuai a Presbytery 47 zinga 40 hi Mizoram chhung a ni a, 7 hi state pawn ami a ni.



AGRICULTURE MINISTER

Agriculture Minister Pu PC Vanlalruata’n khawtlang leh ram kaihhruaina kawngah ram hmangaihna thinlung pu chunga langtlang taka kal a pawimawh a ti a, mipuite rin ngam leh rintlaka uluk taka nun a pawimawh thu a sawi.

Nimin khan Agriculture Minister Pu PC Vanlalruata hian South Tuipui bial chhung khaw hrang hrang- Cherhlun, Tarpho, Khawhri leh; Hrangturzo bial khaw thenkhat- Lungkawlh leh N.Vanlaiphai te a tlawh a, he hunah hian Minister chuan kawng tinrengah taihmak a pawimawh thu sawiin khawtlang leh ram kaihhruaina kawngah rinawm leh langtlang taka kal a tul thu sawiin mipuite rin ngam ni tura theihtawp chhuah a tul thu a sawi.

Minister chuan Cooperative movement chu tha hle mahse Mizo mipuiten an kalpui thiam tawk rihlo deuha a hriat thu sawiin, tun aia hmasawn tur leh cooperative movement zirchiang turin nu leh pa mai bakah thalai mithiam zawkten ngaihvenin, chhawr tangkai se a duh thu a sawi bawk.



GST

Prime Minister Narendra Modi a’n thla hmasa ni 22 a GST rate thar a tihchhuah chuan mipui te ah hlawkna a thlen mek zel a, vawiin hian Haryana ram ei leh bar a nghawng dan kan tarlang dawn a ni.

GST rate thar hian Haryana a loneitute, thilsiamtute leh sumdawnna tenau te tan hmasawnna a thlen nasa hle in, tax lak dan thar siam that chuan bungraw chi hrang hrang ah GST a ti hniam a, hei hian thilsiamchhuaktute hmasawnna thlen in, man tlawm zawk in engkim an hralh chhuah theih phah dawn a ni. He dan thar hian ram chhung a thil siam leh hralh kawng ah te thingtlang leh mahni kutkawih thil siam chhuak tu te ah phur na nasa tak thlen in, ahma aiin siamchhuah leh hralh a that zawk beisei a ni.

